

Mladi i program integracije u EU su prirodni saveznici



«Generacija koja sada sazrijeva u Bosni i Hercegovini može napraviti definitivni razlaz sa prošlošću», ovo je bila ključna poruka iskazana danas u Sarajevu na otvaranju dvodnevne regionalne Konferencije o omladinskoj politici i učešću mladih u javnom životu. Ovaj događaj okupio je više od 130 mladih iz BiH, Makedonije, Crne Gore i Srbije.

Učesnici se fokusiraju na ulogu mladih u javnom životu i procesu odlučivanja. Gosti Konferencije iz cijelog regiona će razgovarati o položaju i statusu mladih ljudi u procesu integracije u EU i njihovom doprinosu daljnjoj demokratizaciji zemalja u regionu, kroz političke aktivnosti ili pritisak civilnog društva.

«Mladi i program integracije u EU su prirodni saveznici. Ukoliko se mladi ljudi angažiraju u političkom procesu, oni postaju dio rješenja i to znači da mogu raditi na tome da se osigura da to rješenje ispunjava potrebe nove generacije građana», poručio je specijalni predstavnik EU u BiH, Miroslav Lajčák, učesnicima na početku Konferencije.

On je konstatirao da obaveze koje se tiču pitanja mladih predstavljaju dio dokumenta Evropsko partnerstvo i Sporazuma o stabilizaciji i pridruživanju potpisanom između BiH i EU. «Ove obaveze uključuju provedbu Zakona o visokoškolskom obrazovanju BiH, koji će, između ostalog, otvoriti put da diplome stečene u BiH budu priznate u inozemstvu kao i da diplome stečene u

inozemstvu budu priznate u Bosni i Hercegovini.»

«Evropska unija je samo u Bosni i Hercegovini u posljednje dvije godine potrošila gotovo milion eura kako bi pomogla razvijanju institucionalnih kapaciteta u sektoru obrazovanja», izjavio je Lajčák. «Ovo je pomoglo postizanje sporazuma o planu reforme za period od 2008.god. do 2013.god., a jedan od glavnih elemenata istog jeste da se oblast obrazovanja u BiH integrira u evropski sistem.»

«Glas mladih, koji je uglavnom konstruktivan, kreativan i glas koji uključuje sve, mora se čuti – i to jasno čuti», poručio je učesnicima šef Delegacije Evropske komisije Dimitris Kourkoulas.

Ambasador Kourkoulas je konstatirao da je «situacija za mlade ljude na Zapadnom Balkanu problematična – a to se naročito odnosi na Bosnu i Hercegovinu, gdje je sektor obrazovanja loše organizovan i neefikasno finansiran i gdje visoka stopa nezaposlenosti znači da se oni koji se tek pojavljuju na tržištu rada suočavaju sa ogromnim poteškoćama». Imajući ovo u vidu, upozorio je: «Nema prostora za gubljenje vremena ili resursa – a tokom protekle decenije, nažalost, vrijeme i resursi koji su se trebali primijeniti u sektoru mladih u BiH su protraćeni negdje drugdje».

Ambasador Kourkoulas je naglasio da je program EU 'Mladi u akciji' dodijelio 885 miliona eura tokom šest godina u cilju povećanja učešća mladih u javnom životu i u reprezentativnoj demokratiji. On je dodao da mladi iz zemalja jugoistočne Evrope, koje još uvijek nisu zemlje članice EU, mogu učestvovati u nekim elementima ovog programa.

«Pretpristupna pomoć EU za Bosnu i Hercegovinu u 2008. i 2009.god. uključuje direktnu pomoć za vladine agencije koje su odgovorne za omladinski sektor, a omladinske nevladine organizacije su sada u mogućnosti da pristupe fondovima putem novog programa Evropski instrument za demokratiju i ljudska

prava», rekao je on. «Ovo nije uzaludan pothvat, već inicijativa za cijeli evropski kontinent koju finansira i u potpunosti podržava Evropska unija. Ova snaga je uz nas!»

Današnji skup mladih iz cijelog regiona predstavlja rezultat povećanog angažmana i saradnje između lokalnih aktera i Evropske unije u promoviranju programa EU u BiH. Početkom ove sedmice, parlamentarci iz BiH su se sastali na uvodnoj sjednici «Parlamenta za Evropu», a akteri iz nevladinog sektora će sutra u Sarajevu razgovarati o njihovom doprinosu debati o EU.

Konferenciji o omladinskoj politici i učešću mladih u javnom životu, koja se završava sutra, prisustvuju predstavnici institucija iz regiona koje su zadužene za pitanja koja se tiču mladih, kao i predstavnici omladinskih i studentskih vijeća, političkih stranaka i međunarodnih organizacija. Ovaj događaj organizira «*Forum Syd-Balkans Programme*» (Forum Syd – Program za Balkan) i Komisija za koordinaciju pitanja mladih pri Vijeću ministara BiH, uz pomoć Švedske agencije za međunarodni razvoj i saradnju (SIDA) te pod pokroviteljstvom specijalnog predstavnika EU u BiH.